

Reagiranje Kuća Erminke Zilić posjeduje potrebnu građevinsku dokumentaciju

"Napravit ću Guantanamo", Oslobođenje, 9. juni 2010;
"U Sekerovoj sve po zakonu"; Oslobođenje, 13. juni 2010.

Cijenjena Redakcijo,

Nije istina da je gospođa Erminka Zilić mi-lo zakona i potrebnih dozvola izgradila kuću. Da je vaš novinar postupio po postulatima profesije, a ne pisao po principu "reče mi jedan č'o'ek", doznao bi da postoji pa i dobio na uvid pravomoćnu urbanističku suglasnost i dozvolu za izvođenje radova, kao i kopije akata iz spisa Službe za inspeksijske poslove Općine Centar.

Nije istina da su Grabovice na inspektora čekale tri mjeseca, kako nekritički prenosi vaš novinar. Iz spisa koji mu nudimo na uvid, on može doznati sve o poduzetim radnjama i nalozima inspektora od prijave početka kako pripremnih, tako i prijave izvođenja radova po pravomoćnom rješenju nadležne službe za upravu za prostorno uređenje i komunalne poslove Općine Centar. Inače, po zahtjevu koji je Emīna Pilav (kćerka supružnika Grabovica) podnijela 31. 5. 2010. godine, inspektor je na teren izašao dan kasnije - 1. 6. 2010. godine. U prisustvu spomenutih supružnika, obavljen je uviđaj, a rješenje kojim je naloženo Erminki Zilić da u roku od 2 (dva) dana po prijemu istog UKLO-VI predmetnu metalnu ogradu investitorke e otpremljeno 7. 6. 2010. godine, kopija je ipućena i podnositeljima zahtjeva.

Nije istina da Grabovice nisu uključene u postupak kako izmjene donesene urbanističke suglasnosti, odnosno odobrenja za

građenje, tako i u postupak inspeksijskog nadzora, o čemu vaš novinar također može dobiti vrlo detaljnu dokumentaciju. U postupku su Grabovice uključene, saslušavane su, a njihov prijedlog za obnovu postupka po donesenim rješenjima nadležne službe Općine Centar od 8. 7. 2009. godine 2. 12. 2009. godine je odbijen. U toku je rješavanje njihovih žalbe u Ministarstvu za prostorno uređenje i zaštitu okoliša Kantona Sarajevo.

Nije istina da je Mirza Islambegović na čelu općinske građevinske inspekcije, kako piše vaš novinar.

Nije profesionalno bez bilo kakve novinarske ograde prenositi nečije tvrdnje da je u Općini neko "podmazan", da je Islambegović "hohštapler građevinski inspektor", ili o neakvoj sili u Općini. Štaviše, po važećem zakonu o zaštiti od klevete u Federaciji BiH to se zove iznošenje ili prenošenje iznesene neistinite činjenice, bilo da se to čini namjerno ili iz nepažnje i kažnjivo je. Po logici kojom se, izgleda, rukovodio vaš neinformirani novinar, bilo koji nezadovoljni građanin može protiv bilo kojeg inspektora ispaliti salvu bilo kakvih optužbi i one se mogu u novinama prenijeti bez bilo kakve provjere ili ograde.

Koliko je profesionalno ne pokušati prikupiti bilo kakve podatke u općinskim službama prije nego što se sačini tekst koji sadržava viđenje svega jedne od tri strane, procijenite i vi i vaši čitatelji. U tome svakako mogu



pomoći odredbe Kodeksa za štampu, prema kojima je nedopustivo namjerno prikrivanje važnih činjenica.

To što se Hirosm odlučio za igru u jednom timu ili toga nije svjestan, neka ide njemu na dušu. Iskreno se, međutim, nadam da ovakvi tekstovi nisu produkt osmišljene uređivačke politike vašeg cijenjenog lista, pa vas stoga srdačno pozdravljam i ohrabrujem da o istom problemu pišete ponovo, već sutra, ali na osnovu dostupnih i validnih činjenica, a ne nećijih impresija.

Mirza ISLAMBEGOVIĆ, dipl. ing. arh.
urbanističko-građevinski inspektor
Općine Centar Sarajevo

Cijenjeni inspektore,

nije istina da se novinar nije želio informirati i u nadležnim općinskim službama: no, kako ste Vi, kao nadležni inspektor u predmetnom slučaju, danima bili na terenu te niste našli za shodno da kad svratite u kancelariju, odgovorite na molbu za uvid u ovaj predmet, odlučili smo tekst objaviti bez Vašeg cijenjenog stava. O zainteresiranosti Oslobođenja, osim Vaših koleginja iz kancelarije Inspekcije, informirana je i sekretarica načelnika Bećirovića, koja može potvrditi naš neuspjeh u traženju Vas. Što se tiče Vašeg rješenja o rušenju ograde, vjerujem da će i površan uvid u Vaš predmeti Vama samom dokumentirati da o rušenju nema ni pomena.

Duboko Vam se izvinjavam što je novinar Oslobođenja, zatečen žestinom Vašeg reagiranja, umjesto publiciranja Vašeg pisma drsko Vas podsjetio na još jedan od Vaših predmeta u kojem ste, također, umjesto odgovora na pitanja novinara odabrali prezentiranje vlastitih stavova u samostalnom nastupu.

Cijenjeći Vaša nastojanja da doprinesete uređivačkoj politici Oslobođenja, najsrdačnije Vam zahvaljujem i vjerujem da mi nećete puno zamjeriti ako sebi dozvolim luksuz da Vas zauzvrat ohrabrim da tako zdušno priomete na svoj posao, barem onim intenzivom i energijom koje ulažete u ocjene rada novinara.

Vildana SELIMBEGOVIĆ,
glavna i odgovorna urednica
Oslobođenja